

**PEMBERITAHU PERTANYAAN DEWAN RAKYAT**

**PERTANYAAN : LISAN**  
**DARIPADA : Y.B. Dato' Sri Azalina binti Dato' Othman Said**  
**[ Pengerang ]**  
**TARIKH : 13.03.2014**  
**SOALAN :**

**Y.B. Dato' Sri Azalina binti Dato' Othman Said [ Pengerang ]** minta **MENTERI PENDIDIKAN** menyatakan apa usaha-usaha yang akan diambil Kementerian untuk memberikan akses pendidikan kepada bahawa kanak-kanak pelarian (*refugees*) di Malaysia.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa prihatin dengan peluang dan hak kanak-kanak di Malaysia mendapat pendidikan, termasuk kanak-kanak pelarian yang tiada dokumen. Walau bagaimanapun, tiada kanak-kanak pelarian dan kanak-kanak tanpa kerakyatan yang bersekolah di sekolah kerajaan atau sekolah bantuan kerajaan. Ini berdasarkan Peraturan-Peraturan Pendidikan (Penerimaan Masuk Murid ke sekolah, Penyimpanan Daftar dan Syarat bagi Pengekalan Murid Belajar di Sekolah).

Sehubungan dengan itu, KPM telah menggubal Dasar Pendidikan Alternatif bagi menyelaras segala usaha dan inisiatif daripada pelbagai pihak dalam menyediakan pendidikan asas kepada kanak-kanak tersebut. Walau

bagaimanapun penyediaan pendidikan bagi kanak-kanak pelarian masih tertakluk kepada 'Arahan 23 Majlis Keselamatan Negara : Mekanisma Pengurusan Pendetang Tanpa Izin Yang Memegang Kad UNHCR'.

Di antara usaha Dasar Pendidikan Alternatif yang dirancang dan dilaksanakan oleh KPM ialah:

1. Menyelaras usaha menyediakan pendidikan asas kepada kanak-kanak yang terlibat;
2. Menetapkan mekanisme pelaksanaan pendidikan alternatif oleh semua agensi terlibat;
3. Menyediakan modul asas kemahiran membaca, menulis dan mengira;
4. Menyediakan modul asas kepada program kemahiran hidup; dan
5. Menggalakkan usaha sama antara agensi kerajaan dan swasta.

Majlis Keselamatan Negara juga telah mengadakan perkongsian pintar bersama-sama *United Nations Children's Fund (UNICEF)*, dan KPM dalam memberi pendidikan asas kepada anak-anak pemegang kad IMM13 (pelarian Filipina) berumur antara 7 hingga 14 tahun yang tidak mempunyai dokumen pengenalan diri yang tidak berpeluang bersekolah di sekolah aliran perdana melalui Pendidikan Alternatif. Kerjasama ketiga-tiga pihak ini telah membawa kepada penubuhan dua (2) Pusat Pembelajaran iaitu Pusat Pembelajaran Kg. Numbak, Kota Kinabalu dan Pusat Pembelajaran Kg. Bahagia, Sandakan Sabah. Seramai 909 kanak-kanak sedang belajar di kedua-dua Pusat Pembelajaran ini.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : UST. DATO' DR. MOHD. KHAIRUDDIN BIN AMAN  
RAZALI [ KUALA NERUS ]**

**TARIKH : 13 MAC 2014**

**SOALAN :**

**Ust. Dato' Dr. Mohd. Khairuddin bin Aman Razali [ Kuala Nerus ]  
minta MENTERI PERUSAHAAN PERLADANGAN DAN KOMODITI  
menyatakan langkah-langkah yang telah dan akan diambil oleh  
Kerajaan untuk menarik golongan muda melibatkan diri dalam industri  
getah.**

## **JAWAPAN:**

Tuan Yang Di-Pertua,

Untuk makluman Yang Berhormat, Kementerian melalui Lembaga Getah Malaysia (LGM) mengadakan pelbagai program bagi menggalakkan golongan belia terutamanya lepasan sekolah untuk menceburi dalam industri getah.

Dari tahun 2009 hingga 2013, Akademi Hevea Malaysia (AHM) di bawah LGM telah menyediakan latihan dalam industri getah bagi seramai 2,277 orang, di mana seramai 1,316 peserta telah menghadiri latihan dalam pengurusan perladangan manakala baki seramai 961 peserta telah dilatih dalam sektor hiliran. Kesemua kursus ini telah dijalankan secara jangka masa pendek.

Bagi sektor hulu, kursus-kursus yang dijalankan adalah berkaitan dengan pengurusan ladang termasuk kursus Sijil Teknologi Getah yang menumpukan kepada penjagaan ladang dan pemprosesan getah kepada belia lepasan Sijil Pelajaran Malaysia. Kursus ini dijalankan selama 18 bulan dan ianya adalah setara dengan tahap 3 (sijil) di bawah Kerangka Kelayakan Malaysia (MQF) oleh *Malaysian Qualification Agency* (MQA). Bagi tempoh 2010 hingga 2013, seramai 41 orang telah mengikuti kursus ini.

Tuan Yang Di-Pertua,

Bagi menggalakkan penyertaan dalam sektor hiliran, LGM juga menyediakan pinjaman kepada para pelajar mengikuti kursus-kursus berkaitan industri getah sehingga ke peringkat Ijazah. Bagi tempoh 2003 hingga 2013, seramai 62 pelajar yang berkelayakan telah diberi pinjaman/biasiswa oleh pihak LGM untuk mengikut program/kursus dalam sektor getah di pusat-pusat pengajian tinggi.

Daripada jumlah tersebut, seramai 21 kakitangan LGM mengikuti program Diploma dan Ijazah Sarjana Muda manakala 41 orang pelajar mengikuti kursus teknologi getah asli. Melalui program ini, para pelajar yang berjaya berpeluang bekerja di syarikat-syarikat yang terlibat di dalam industri getah.

Selain itu juga, Kementerian menganjurkan secara berkala program "Hello Komoditi" yang bertujuan antara lain mempamerkan potensi perniagaan dan peluang-peluang pekerjaan dalam industri komoditi termasuk sektor getah. Bagi tahun 2013, sebanyak 9 program "Hello Komoditi" telah diadakan di beberapa tempat di seluruh negara.

Sekian, terima kasih.